

四庫全書

子部

欽定四庫全書

子部  
山堂肆考卷三

詳校官中書臣孫溶

主事臣祁韻士覆勘

總校官降調編修臣倉聖脉

校對官中書臣田尹衡

謄錄監生臣沈恕

欽定四庫全書

山堂肆考卷三

明 彭大翼 撰

天文

月

附月蝕

淮南子曰月一名夜光月御曰望舒亦曰纖阿尚書  
大傳曰晦而月見西方謂之朏朔而月見東方謂之  
朏亦謂之側匿釋名朏月未成明也魄月始生魄也  
朔蘇也月死復蘇生也晦灰也死為灰月光盡似之

也弦月半之名其形一旁曲一旁直若張弓弦也望日月遙相望也注云承大月月生二日謂之魄承小月月生三日謂之朏

生明

尚書大傳書云哉生明哉生魄說者以為朔後月明生而魄死望後月明死而魄生故書以朔望生明生魄紀月也註云哉始也又乾鑿度曰月三日成魄八日成光

養魄

十洲記冬至後月養魄於廣寒宮

似鏡

漢京房曰月與星辰陰者也有形無光日照之乃有光  
先師以為日似彈丸月似鏡體或以為月亦似彈丸日  
照處則明不照處則闇一說其質常圓其體本黑受日  
之光而白

如圭

江文通別賦秋露如珠秋月如圭

懸弓偃瓦

侯鯖錄新月占雨說月如懸弓少雨多風月如偃瓦不求自下

讓壁燒銀

梁戴嵩月重輪詩浮川疑讓壁入戶類燒銀

女狄吞精

遁甲開山圖榮氏解女狄暮汲石紐山下泉水中得月精如雞子愛而含之不覺吞下遂有娠十四月生夏禹

嫦娥竊藥

張衡靈憲羿請不死之藥於西王母羿妻嫦娥竊以奔  
月將往枚筮之於有黃有黃占之曰吉翩翩歸妹獨將  
西行逢天晦芒母驚母恐後且大昌嫦娥遂托身於月  
是為蟾蜍袁郊詩云嫦娥竊藥出人間藏在蟾宮不放  
還后羿遍尋無覓處誰知天上亦容奸

牛喘

劉義慶世說滿奮字武秋在晉武帝坐北窓下作琉璃

屏似密實疎奮有寒色帝笑之奮曰臣猶吳牛見月而喘注云吳牛畏暑見月疑是日所以喘也

鵲飛

魏武帝短歌行月明星稀烏鵲南飛遶樹三匝無枝可棲

占姓

左成十六年楚晉將戰晉侯夢呂錡射中月退入於泥占之曰姬姓日也異姓月也必楚王也及戰射中共王



目錡死之

見名

會稽先賢傳闕澤字德潤年十三夢見名字炳然在月中

磨蛤水生

淮南子曰方諸見月則津而為水高誘注云方諸陰燧大蛤也磨拭令熱以向月則水生也

畫灰暈缺

淮南子曰畫蘆灰而月暈闕許慎注云有軍事相圍守則月暈以蘆灰為環缺其一面則月圓亦闕於上

觀蓂

帝王世紀堯時有草夾階而生每月朔日生一莢至月半則生十五莢十六日後落一莢至月晦而落盡若月小餘一莢一名歷莢一名僊茆故抱朴子曰昔帝轅候鳳鳴以調律唐堯觀蓂莢以知月

伐桂

酉陽雜俎月中桂樹高五百丈下有一人常斫之樹創  
隨合其人姓吳名剛西河人學僊有過謫令伐桂

庾亮登樓

晉庾亮字元規鎮武昌諸佐史殷浩之徒秋夜乘月登  
南樓俄而亮至諸將起避之亮曰諸君且少住老子於  
此興復不淺遂據胡床與浩等談詠其坦率如此

袁宏泛渚

晉書謝尚字仁祖鎮牛渚秋夜乘月率爾與左右微服

泛江會袁宏在舫中諷誦聲既清雅詞又藻拔尚遣問  
答曰是袁臨汝郎誦詩即其詠史之作也尚即迎近舟  
與之譚論達旦不寐注云臨汝郎宏父嘗為臨汝令也  
宏字彥伯

廣寒府

方朔十洲記唐明皇八月望日遊月宮見天府榜曰廣  
寒清虛之府素娥十餘人皆皓衣乘白鸞舞於桂樹之  
下

# 太液池

宋太祖幸後池對新月置酒召當直學士盧多遜使賦詩多遜請韻太祖曰用兒字多遜詩云太液池邊看月時晚風吹動萬年枝誰家玉匣開新鏡露出清光些子兒太祖大喜盡以坐間飲食之器賜之又曹希孟貨詩都下有人以敲梢交為韻索新月詩曹云禁鼓初聞第一敲乍看新月出林梢誰家寶鏡新磨出匣小參差蓋不交蓋摹多遜之句也

高祖被圍

漢書高祖七年月暈圍參畢七重占曰畢昴之間天街也街北胡也街南中國也昴為匈奴參為趙畢為邊兵是歲高祖自將至平城為冒頓所圍七日乃解

匈奴舉事

漢書匈奴傳匈奴舉事常隨月盛壯以攻戰月虧則退兵

玉斧修

酉陽雜俎太和中鄭仁本表弟與王秀才遊嵩山忽迷路見一人方睡熟呼之其人枕襪而坐曰君知月乃七寶合成乎月勢如丸其影則日爍其凹處也常有八萬三千戶修之予即一數因開襪有斤鑿數事玉屑飯兩裹授二人曰分食此雖不足長生可一生無疾耳乃起與二人別指一支徑曰但由此自合官道笑言已不見王荆公詩玉斧修成寶月圓月邊仍有女乘鸞青冥風露非人世鬢亂釵橫特地寒

瓊樓滿

酉陽雜俎翟天師乾祐峽中人曾於江岸與弟子十許人翫月或問月中竟何所有乾祐曰隨我指看之弟子中兩人見月規半圓瓊樓金闕滿焉數息間不復見

僊人弄影

唐上官儀應詔詩中用影娥池學士無解其事者祭酒令狐德棻召張柬之等十餘人求出處柬之對曰洞冥記漢武於望鶴臺西起俯月臺臺下穿影娥池每登臺



眺月影入池中如僊人乘舟笑弄月影因名影娥池亦  
曰眺蟾臺德棻嘆其博

佳人弄色

東坡新月詩新月如佳人出海初弄色娟娟到湖上潋  
潋搖空碧

舉杯邀月

唐李白月下獨酌詩花下一壺酒獨酌無相親舉杯邀  
明月對影成三人

停杯問月

李白問月詩青天有月來幾時我今停杯一問之人攀  
明月不可得月行却與人相隨

捉月

李白曾為永王璘門下客後璘作亂或奏白使之拘白  
坐罪當誅郭子儀請解官贖罪詔長流於夜郎因過采  
石江酒醉見月在江中以手弄之失水而死後人謂其  
捉月

取水

周禮秋官司烜氏掌以夫遂取明火於日以鑒取明水於月

金鏡

宋晁補之詠月詞曰青烟幕處碧海飛金鏡永夜閑塔桂影露涼時零落多少寒蛩神京遠唯有藍橋近按補之字無咎宗慤之曾孫也

玉盤

李白朗月行小時不識月呼作白玉盤又疑瑤臺鏡飛  
上青雲端宋田畫詩少皞磨成白玉盤六丁擎出太虛  
寬青光千古復萬古留向人間此夜看

搗藥兔

杜詩天上秋期近人間月影清入河蟾不沒搗藥兔長  
生五經通義云月中有兔與蟾蜍何月陰也蟾蜍陽也  
而與兔並明陰係於陽也又楚辭夜光何德死則又育  
厥利維何而顧兔在腹按顧兔謂顧望之兔也

銜桂雞

郭子橫洞冥記有遠飛雞夕則還依人曉則絕飛四海  
嘗銜桂實歸於南土本草圖經江東諸處每至四五月  
後嘗於衢路拾得桂子大如狸豆破之辛香故老相傳  
是月中落也北方獨無者非月路也又張君房為錢塘  
令夜宿月輪山寺僧報曰桂子下塔遽起望之紛如烟  
霧回旋成穗散墜如牽牛子黃白相間咀之無味則桂  
子之落往往有之但人不識耳

山河影

淮南子曰月中有物娑婆者乃山河影也其空處海水影也又釋氏書云須彌山南面有閻扶樹月過樹影入月中也

水氣精

淮南子曰積陰之寒氣為水水氣之精為月

祭坎

禮祭義祭日於壇祭月於坎以別幽明以制上下

應潮

抱朴子曰月之精生水是以月盛而潮大

魚腦減

淮南子曰月者陰之宗也是以月虛而魚腦減月死而

螺蠃焦螺一作羸

蚌胎降

蘇子美曰老蚌吸明月而降胎呂氏春秋月羣陰之本  
月望則蚌蛤實羣陰盈月晦則蚌蛤虛羣陰棼

夢月入懷

漢書元后母夢月入懷而生后遂為天下母又搜神記  
曰孫堅妻夢月入懷告堅曰妾昔懷策夢月入懷今又  
夢堅曰子孫興矣遂生權

取月置袖

宣室志唐太和中周生者有道術中秋夜與客會月色  
方瑩謂坐客曰我能梯雲取月置之懷袖因取筯數百  
條繩而駕之曰我上梯取此月俄而以手舉衣懷中出



月方寸許光色燦爛寒氣侵人入肌膚

徐孺夜戲

世說徐孺子年九歲嘗夜戲月下人語之曰若令月中  
無物當極明徐曰不爾譬人眼中瞳子無之未必不暗  
也又晉書會稽王道子庭中夜坐月色無玷嘆以為佳  
謝重率爾對曰不如微雲點綴道子曰卿居心不淨乃  
欲滓穢太清耶

子建夜遊

曹子建公讌詩清夜遊西園飛蓋相追隨明月澄清影  
列宿正參差

令人和悅

蘇東坡在汝陰州堂前梅花大開月色鮮霽王夫人曰  
春月色勝如秋月色秋月令人悽慘春月令人和悅先  
生大喜遂召二歐飲作減字木蘭花詞云不似秋光只  
與離人照斷腸杜詩云秋月解傷神

隨人遠近

梁朱超舟中望月詩大江濶千里孤舟無四鄰唯餘故樓月遠近必隨人

阮帷

阮籍詩夜中不能寐起坐彈鳴琴薄帷鑒明月清風吹我衿

潘室

潘岳悼亡詩皎皎窓中月照我室南端清商應秋至淠暑隨節闌

方暉圓影

梁沈約詠月詩方暉竟戶入圓影隙中來高樓切思婦  
西園遊上才

半形全影

周王褒關山詩半形同漢陣全影逐胡兵

經箕離畢

周書庶民惟星星有好風星有好雨日月之行則有冬  
有夏月之徙星則以風雨注云好風者箕星好雨者畢

星孔安國尚書傳月經於箕則多風月離於畢則多雨  
詩小雅月離于畢俾滂沱矣

警闕示冲

南宋謝莊月賦擅扶光於東沼嗣若英於西冥引玄兔  
於帝臺集素娥於後庭朐眈警闕眈魄示冲順辰通燭  
從星澤風增華台室揚彩軒宮委照而吳業興淪精而  
漢道融注云扶光扶桑之光也東沼陽谷也若英若木  
之英也西冥昧谷也月盛於東故曰擅始生於西故曰

嗣警闕謂朏朏失度則警人君有所闕德示冲言朏魄  
得所則表示人君有謙冲不自盈大也按莊字希逸

西齋長憶

李頻月夜憶別詩早晚更看吳苑月西齋長憶月當牕  
不知明夜誰家見應照離人隔楚江

南牕借看

黃山谷詩開盡南牕借月看

墮環

白樂天詩稀星點銀礫落月墮金環

學扇

杜詩月生初學扇

食以氣

已下月蝕

日之食也以形月之食也以氣月受日之光不受日之精相望中弦則光為之食至於大陽乃火之精也火正當氣焰之上必有黑暈以月正對此黑暈中日必食也

食以交

月一年十二會十二望有食有不食者交則食不交則不食也然日食少而月食多者蓋日月行有常度一月必一會但月體小日體大故雖行度差路交關苟非相掩太多則日常不食月則稍有交關相射則必食食且既也

擊鑑

開元天寶遺事長安城中每月食士女取鑑向月擊之云救月食



壞輪

唐盧仝月蝕詩爛銀盤從海底出出來照我茅屋東天  
色紺滑凝不流水光交貫寒腫朧初疑白蓮花浮出龍  
王宮八月十五夜比並不可雙此時怪事發有物吞食  
來輪中輪如壯士斧斫壞桂似雪山風拉摧百鍊鏡照  
見膽平地埋寒灰火龍珠飛出腦却入蚌蛤胎搥環破  
壁眼看盡當天一搭如煤炰磨蹤滅跡須臾間便似萬  
古不可開又聞古老說食月蝦蟇精徑圓千里入汝腹

如此癡騃阿誰生須臾癡慕精兩吻自決拆初露半箇  
壁漸吐滿輪魄衆星盡原赦一蠶獨誅磔腹肚忽脫落  
依舊挂穹碧光彩未蘇來慘淡一片白奈何萬里光受  
此吞吐厄

星

說文萬物之精上為列星唐嚴思善曰山川精氣上  
為列星又黃帝定星次可名者三百二十微星一萬  
一千五百景星如周伯舍譽格澤星之吉也彗星孛

星長星蓬星星之凶也漢書音義絕跡而去曰飛星  
光跡相連曰流星亦曰奔星一說自天橫飛而過為  
流自下復上為奔自上而下為隕

### 三台

漢天文志魁下六星兩兩而比者曰三台在人為三公  
晉天文志三台六星西近文昌二星曰上台為司命次  
二星曰中台為司中東二星曰下台為司祿史記台作  
能

四輔

晉天文志太微東藩四星一曰上相二曰次相三曰次將四曰上將所謂四輔也西藩四星一曰上將二曰次將三曰次相四曰上相亦曰四輔

五老

論語識仲尼曰吾聞堯與舜等遊首山觀河渚有五老遊河一老曰河圖將來告帝期二老曰河圖將來告帝謀三老曰河圖將來告帝書四老曰河圖將來告帝圖

五老曰河圖將來告帝符歌訖五老飛為流星上入昴  
三公

晉天文志斗杓南三星及魁第一星西三星皆曰三公  
主宣德化和陰陽

六府

史記天官書文昌六星在北斗魁前天之六府也主集  
計天道

六符

東方朔傳泰階六符注云泰階三台也每台二星凡六星六符者六星之符驗也又星名二咸主防奢

二主

隋天文志北極第一星主月太子也第二星主日帝王也第三星主五星庶子也

二使

東漢書和帝分遣二使各至州縣觀採風謠二使當到益部投館吏李邵舍邵知天文因問曰二君發京師時

知朝廷遣二使否二使問何以知之邵曰前有二使星向益州分野故知之耳邵字孟節南鄭人

### 帝車

天象列星圖北斗七星在太微之北是為帝車運乎中央臨制四方

### 郎位

史記天官書南宮後聚一十五星蔚然曰郎位傍一大星將位也正義曰郎位五星在太微中帝座東北周之

元士漢之光祿中散諫議此三署郎中即今之尚書郎也郎將一星在郎位東北即今之左右中郎將也

東壁

晉天文志東壁二星主文籍天下圖書之府也明則圖書集道術行小人退君子入

西藩

晉天文志紫宮十五星其西藩七東藩八在北斗之北

三辰綱紀



前漢天文志北斗天之三辰綱紀星也

七政樞機

前漢律歷志北斗七星輔一星在太微之北乃七政之樞機陰陽之元本也

編珠

尚書中候天地開闢甲子冬至日月若懸壁五星若編珠

連貝

尚書考靈耀仰觀天形如車蓋衆星纍如連貝

食昴

漢書鄒陽上書衛先生為秦畫長平之事太白食昴按  
太白天之將軍其精誠上達於天故太白為之食昴

守歲

唐史李晟初屯渭橋時熒惑守歲久之方退或勸曰熒  
惑已退可速用兵晟曰汝安知天道及克敵謂叅佐曰  
前者士大夫勸晟出兵非敢拒也常聞五緯盈縮無準

晟懼復來守歲則我軍不戰而自潰矣衆皆曰非所及也

歲星居心

唐權德輿歲星居心頌序春三月司天氏奏歲星居心宿五度其色黃明潤大光澤帝位積五十餘日詔下有司頒示中外故臣得而言之以形歌頌按心星大火心星也詩七月流火即此

尾心伏辰

左僖五年晉侯伐虢圍上陽問於卜偃曰吾其濟乎對曰克之童謠丙之晨龍尾伏辰均服振振取虢之旂鷄之賁賁天策焞焞火中成軍虢公其奔其九月十月之交乎注云龍尾尾星也日月之會曰辰日在尾故尾星伏而不見

經天

南史義熙元年太白晝見經天凡七乃人更主異姓當興之象時晉受禪於宋太白晚見者其常也與日抗則

為晝見過已當丙位則為經天其變也在朝象官在人象事在野象物

助月

孫柔之瑞應圖景星者天之精也狀如半月生於晦朔助月為明王者不私人以官使賢者在位則見又天文志辰星居於卯地或辰星勾月主年豐國泰

徙舍

呂氏春秋宋景公時熒惑守心子韋曰禍當君可移於

相公曰宰相所與理國家也而移死焉不祥寡人請自當也曰可移於民公曰民死寡人將誰與為君曰可移於歲公曰歲荒人必死誰與我為君乎子韋曰君有至德之言三天必三賞君熒惑必徙三舍候之果徙三舍

出房

宋符瑞志帝舜時景星出房堯即位七十載景星出翼隋天文志周王之興五星聚房亦雀啣書止於王居

聚奎

宋竇儀字可象薊州漁陽人善推步周顯德中與盧多遜楊徽之同在諫垣謂二公曰丁卯歲五星當聚於奎奎主文明又在魯分自此天下始太平公必見之老夫不與也至宋乾德四年三月五星如連珠在降婁之次果驗其言

淫梟

左襄二十八年春無冰梓慎占曰今茲宋鄭其饑乎歲在星紀而淫於玄枵以有時菑注云是年歲星當在星

紀明年乃在玄枵今已在玄枵淫行則失次矣

臨國

瑞應圖王者承天則老人星臨其國

隆營

諸葛亮傳有星赤而芒角自東北西南流隆營中俄而亮卒

聚東井

漢高祖元年冬十月五星聚東井注云東井秦之分野



五星所在當有聖人以義取天下又秦主生時有秦太白犯東井者曰東井秦之分太白謫見必有暴兵起於京師生曰星入井者自為渴耳何足怪乎未幾符堅弑生自立

### 守南斗

晉史熒惑守南斗經旬王導語陶回曰南斗楊州分野而熒惑守之吾當遜位以厭其謫回答曰公以明德作相輔弼明主當親忠貞遠邪佞而與桓景造膝熒惑何

由退舍導深愧之又梁武帝大通六年熒惑入南斗去而復還上以諺曰熒惑入南斗天子下殿走乃跣足下殿以禳之及聞魏主西奔慙曰虜亦應天象邪

### 流渚

河圖大星如虹下流華渚女節意感生白帝是為少昊  
照郊

帝王世紀神農氏之末少昊氏娶附寶見大電光繞北斗樞星照郊感附寶孕二十月而生黃帝於壽丘

聚觚參

北史元魏普太元年十月歲星熒惑鎮星太白聚於觚參太史占曰當有王者興後高歡興齊

聚牛女

晉永嘉中歲星鎮星熒惑太白聚於牛女識者以為興王是歲元帝即位

賢人聚

陳太丘詣荀朗陵貧儉無僕役乃使子元方將車季方

持杖從後孫長文尚少載著車中既至荀使叔慈應門  
慈明行酒餘六龍下食文若亦小坐著膝前時夜德星  
聚明旦太史奏五百里內有賢人聚

異兒來

宋書孫休永安二年將守質子羣聚嬉戲有異小兒忽  
來曰我非人熒惑星也言訖上昇仰而觀之若曳一匹  
練有頃而沒

犯少微

續晉陽秋會稽謝敷字慶緒隱居若耶山月犯少微星  
少微星一名處士星時戴逵字安道名著於數時人為  
逵憂之俄而敷死故會稽人士嘲逵曰吳中高士求死  
不得

夢長庚

唐李白母夢長庚星而生白故名白字太白天官書長  
庚如一匹布著天此星見兵起韓詩太白晨出東方曰  
啟明昏見西方曰長庚朱氏曰啟明長庚皆金星也以

其先日而出故謂之啟明後日而入故謂之長庚蓋金  
水二星常附日行而或先或後但金大水小故獨以金  
星言之也

客星犯座

隱逸傳嚴光與漢光武有舊入謁帝與同宿半夜光足  
加帝腹明旦太史奏客星犯帝座甚急帝笑曰朕故人  
嚴子陵也

客星入市

漢書吳郡周敞師事京房房為石顯所譖繫獄謂敞曰  
吾死後四十日客星必入市即吾無辜之驗也房死果  
如其言唐太宗時李淳風奏北斗七星當化為人明日  
至西市飲酒使人候之有僧七人共飲酒二石太宗使  
人召之七人笑曰此必李淳風小兒在彼言我也忽不  
見

郎官上應

漢館陶公主為子求郎明帝不許而賜錢千萬謂羣臣

曰郎官上應列宿出宰百里苟非其人民受其殃是以難之按館陶公主武帝之姑號竇太主堂邑侯陳午尚之

浮屠仰視

南唐書伍喬廬江人性嗜學渡江入廬山詩調清苦山中浮屠夜夢仰視一大星旁有人指之曰此伍喬星也喬在廬山時苦節自勵一夕見人掌自牖入掌中有讀易二字喬因取易讀之後舉進士第一又宋臧丙舊名



愚字仲回大名人既孤嘗夢其父召立於庭向空指曰  
老人星見矣丙仰視之黃明潤大因望而拜既寤私喜  
曰吉祥也以壽星出丙入丁因改名丙字夢壽

傳說騎箕

莊子曰道有情有信無為無形可傳而不可受可得而  
不可見莫知其始莫知其終傳說得之以相武丁奄有  
天下乘東維騎箕尾而比於列星蓋言說死其精神托  
箕尾也

蕭何稟昂

春秋佐助期蕭何長七尺八寸稟昂星精而生郭璞注  
昂西方之宿別名旄頭天官書曰胡星也為白衣會

遊人中

漢武帝內傳西王母使者至東方朔死上問使者對曰  
朔木帝之精是為歲星下遊人中以觀天下非陛下臣  
也

居帝右

宋藝祖居潛日與趙普遊長安入酒舍普偶坐席左陳  
希夷怒曰紫微垣一小星耳輒據上次可乎斥使居帝  
右

真人無敵

漢桓帝時有黃星見楚宋之分殷馘言後五十年當有  
真人起梁沛間其鋒不可當後至五十年曹公破袁紹  
天下無敵矣

大將宜當

晉祖逖傳有妖星見豫州之分陳訓曰今年西北大將  
宜當之祖逖亦見星曰為我矣方平河北天欲殺我此  
天不祐國也俄而逖卒

龍體

天官書軒轅黃龍體注云軒轅十七星在七星北黃龍  
之體主雷雨之神後宮之象也

鳥注

天官書梟為鳥注主草木漢天文志注作喙爾雅鳥喙

謂之桺孫炎曰喙朱鳥之口桺其星聚也以注為桺星故主草木

東指西指

彗星出東則西指出西則東指此其常也東西偏指其變也

出地入地

北斗七星出地三十六度故見南斗六星入地三十六度故不見按史記天官書北斗七星所謂璇璣玉衡以

齊七政也春秋運斗樞曰北斗七星第一天樞第二璇  
第三璣第四權第五衡第六開陽第七瑶光第一至四  
為魁第五至七為杓合則為斗居陽布陰故稱北魁四  
星為璇璣杓三星為玉衡注云杓斗柄也衡斗之中也  
又按雜俎北斗魁第一星神名執陰第二星名叶詣第  
三星名視金第四星名拒理五星名防忤第六星名  
開寶第七星名招搖

七主

馬融註尚書北斗七星各有所主第一星曰主日法天  
第二星曰主月法地第三星曰命火謂熒惑也第四曰  
煞土謂填星也第五曰伐水謂辰星也第六曰危木謂  
歲星也第七曰罰金謂太白也

### 九屬

賈公彥曰雍州屬魁星冀州屬樞星兗州青州屬璣星  
徐揚二州屬權星荊州屬衡星梁州屬開陽豫州屬瑤  
光北斗有七星州有九但兗青徐揚併屬二州故七星

主九州也

羸縮

前漢天文志五星早出者為羸羸者為客晚出者為縮縮者為主入天官書其趨舍而前曰羸退舍曰縮

圜角

天官書五星色白圜為喪早赤圜則中不平為兵青圜為憂水黑圜為疾多死黃圜則吉赤角犯我城黃角地之爭白角哭泣之聲青角有兵憂黑角則水意



精降

晉天文志凡五星羸縮失位其精降於地為人歲星降為貴臣熒惑降為童兒歌謠嬉戲鎮星降為老人婦女太白降為壯夫處於林麓辰星降為婦人吉凶之應隨其象

罰見

漢天文志仁虧貌失逆春令傷木氣罰見歲星禮虧視失逆夏令傷火氣罰見熒惑義虧言失逆秋令傷金氣

罰見太白智虧聽失逆冬令傷水氣罰見辰星四者皆失鎮星乃為之動又按五星在天高則影小低則影大歲星東方木星十二年一周天熒惑南方火星二年一周天太白西方金星一年一周天填星中央土星十八年一周天

主營仗

鈎陳六星衛紫微宮今離宮別衛取象焉一曰主營仗為喉舌

東漢李固曰北斗天之喉舌尚書陛下之納言斟酌元氣運乎四時出納王命所謂制氣之臣也

天狼

天官書天狼奴星名主侵掠故楚辭曰舉長矢兮射天狼又有星曰天駟爾雅曰天駟房也龍為天馬故房四星謂之天駟又有天狗狀如大奔星注云星有尾旁有短彗如狗形又匏瓜星一名天雞在河鼓東明則歲大熟

地鴈

淮南子曰流星色青赤曰地鴈其所墜主兵起流星有光青赤曰天鴈軍甲之精華也

五佐

天官書水火金木土此五星者天之佐為經緯見伏有時所過行贏縮有度

七公

七公星主理獄

晨見南方

國語農祥晨正注云農祥房星也晨正謂立春之日房星晨見於南方為農事之候

昏見東方

詩唐風綢繆束薪三星在天注云三星心也在天昏始見於東方建辰之月也

金精

天官星占太白者金之精白帝之子大將之象也

石質

黃石公記黃石鎮星之精也黃者鎮星色也石者星質也

枉矢

天官書枉矢類大流星地行而倉黑望之如有毛羽然  
劉向說苑秦胡亥立日月薄蝕枉矢光熒襲月

貫索

正義貫索九星在七公前一曰連索一曰連營一曰天

牢主法律禁暴強故天官書賤人之牢占星悉見則獄事繁不見則刑務簡動搖則斧鉞用中虛則改元口開則有赦閉口及星入牢有自繫死者

### 員官

天官書七星頸為員官主急事員官嚙喉也物在嚙喉終不久留故主急事

### 嫠女

爾雅須女謂之嫠女注云須女賤妾之稱主布帛裁製

嫁娶若水守之萬物不成火守之布帛貴人多死土守之有女卒金守之有兵起

天苑

天官書九星三處羅一曰天旗二曰天苑三曰九游注曰天苑十六星如環狀在畢南天子養禽獸之所暗則禽獸多死亡

天倉

天官書胃為天倉注云胃三星為趙之分野主倉廩五



穀之府又軫南衆星曰天庫昂畢間為天街其南有四  
星曰天厠又荊州星占北辰一名天闕一名北極北極  
者紫宮天座也

### 策馬

天官書漢中四星曰天駟旁一星曰王良王良策馬車  
騎滿野注云王良五星在奎北河中天子奉御官也其  
動策馬則兵騎滿野客星守之則津橋不通金火守入  
皆兵之憂也按豫章周騰字叔達為侍御史漢桓帝欲

南郊平明將出叔達仰視曰王者象星今宮中星及策馬星悉不動帝何出焉至四更皇太子卒遂止

### 牽牛

天官書牽牛為犧牲織女天女孫也注云牽牛亦主關梁織女主瓜果絲帛珍寶爾雅河鼓謂之牽牛歲時記黃姑即河鼓也焦氏易林曰天河之西有星煌煌與參俱出謂之牽牛天河之東有星微微在氏之下謂之織女又吳均續齊諧記桂陽成武丁有僊道忽謂其弟曰

七月七夕織女當渡河諸僊悉還宮吾向已被召今與爾別矣弟問何事渡河兄當何日還答曰織女暫詣牽牛吾去後三十年當還耳世人至今云織女嫁牽牛

見丙見丁

天官書狼比地有大星曰南極老人老人見治安不見兵起常以秋分時候之於南郊附耳入畢中兵起注云比地近地也老人一星在弧南一曰南極為人主壽命延長之應常以秋分之曙見於丙春分之夕見於丁不

見人主憂也一說作見於丙沒於丁又火星季春出於辰季秋伏於戌

為商為晉

左昭元年子產曰昔高辛氏有二子長曰閼伯季曰實沈不相能也日尋干戈以相征討后帝不臧遷閼伯於商丘主辰商人是因故辰為商星遷實沈於大夏主參唐人是因故參為晉星

青林

文選獵青林之芒角青林天苑星也

白榆

古樂府詩天上何所有歷歷種白榆按白榆星也

五星主舍

漢天文志注歲星主角亢氐房心尾箕熒惑主井鬼柳  
星張翼軫鎮星主東井太白金奎婁胃昂畢觜參辰星  
主斗牛女虛危室壁

五星分野

天文志歲星主泰山徐青兗熒惑主霍山揚荆交鎮星  
主嵩山豫州太白星主華山梁雍益辰星主常山冀幽  
并

瑤光玉繩

張平子西京賦上飛闥以仰眺睹瑤光與玉繩注云瑤  
光北斗第七星玉繩即玉衡北兩星

狗約欃槍

爾雅奔星為狗約彗星為欃槍欃槍形如掃帚即旄頭

星也見則有近患杜詩云戮力掃欃槍是也

后妃移動

秦苻堅以弟融為冀州牧將發祖於灞上堅母苟氏以融少子比發三至灞上其夕又竊如融所內外莫知是夜堅寢前殿太史奏天市南門屏內后妃星失明左右閹寺不見乃后妃移動之象也堅推問知之驚曰天道不遠

主君有嫌

隋吳嶠霄溪人精天文袁天綱師事之煬帝時嘗過鄴  
中告其令曰中星不守太微主君有嫌王氣流萃於秦  
地子知之乎令不之信及唐高祖卽位始知其言不誣  
童子給水


晉僧義興結屋於寧波府天童寺中有一童子日給薪  
水後辭去曰吾太白辰也言訖不見寺因此得名

侍兒謫春

李元獨異志秦併六國時太白星竊織女侍兒梁玉清



衛承莊逃入衙城小僊洞四十六日不出天帝怒命五岳搜捕太白歸位衛承莊逃焉玉清謫於北斗下常春有子名子休配與河伯行雨子休每至小僊洞耻其母淫奔之所輒回馭不經故其地常少雨也



山堂肆考卷三

欽定四庫全書

子部  
山堂肆考卷四

詳校官中書臣孫溶

主事臣祁韻士履勘

總校官降調編修臣倉聖脉

校對官中書臣田尹衡

謄錄監生臣沈怒

欽定四庫全書

山堂肆考卷四

明 彭大翼 撰

天文

風

風俗通飛廉風伯也箕星風師也莊子曰汝聞人籟  
而未聞地籟汝聞地籟而未聞天籟夫大塊噫氣其  
名曰風作則萬竅怒號埤雅天地之氣噓而成雲噓  
而成風黃帝風經風者氣也得怒之氣則暴得喜之

氣則和得金之氣則涼得木之氣則溫得火之氣則炎得水之氣則烈後漢張奐曰風為號令動物通氣又春風自下而上紙鳶因之而起夏風橫行空中樹杪多風聲秋風自上而下木葉着之而墮冬風著土而行吼地而生寒

解溫阜財

家語舜作五絃琴歌南風詩曰南風之薰兮可以解吾民之愠兮南風之時兮可以阜吾民之財兮

偃禾拔木

周書武王既喪管叔及其羣弟乃流言於國曰公將不利於孺子周公居東二年為詩以貽王名之曰鷓鴣秋大熟未獲天大雷電以風禾盡偃大木斯拔邦人大恐王與大夫盡弁以啟金縢之書乃得周公所自以為功代武王之說王執書泣曰昔公勤勞王家惟予冲人弗及知今天動威以彰周公之德王出郊迎周公天乃雨反風禾則盡起歲大熟

飛車

帝王世紀竒肱氏能為飛車從風遠行湯時西風吹竒  
肱車至於豫州湯破其車不以示民十年東風至湯復  
作車遺賜之去玉門四萬里

折蓋

崔豹古今注武王伐紂大風折蓋太公因折蓋之形而  
製曲蓋

歌北歌南

左襄十八年楚侵鄭甚雨楚師多凍役徒幾盡晉人聞有楚師師曠曰不害吾驟歌北風又歌南風南風不競多死聲楚必無功

叩商叩角

列子曰當春而叩商絃以召南呂涼風忽至草木成實及秋而叩角絃以激夾鍾溫風徐回草木發榮命官而總四絃則景風翔慶雲浮甘露降醴泉涌

轉蕙泛蘭



宋玉招魂光風轉蕙泛崇蘭步經堂入奧朱塵筵步注  
云光風謂雨已日出而風草木有光色也轉搖也汜猶  
汎汎搖動貌崇充也

吹花擘柳

遯齋閑覽河朔春時多大風飛塵撼木數日一作每作  
輒三二日方止以訪左右對曰不得是風且無年是名  
吹花擘柳草木百穀皆藉之

麥信風

國史補江淮船汴流而上常待東北風謂之信風七八月有上信三月有鳥信五月有麥信風土記南中六月有東南長風號黃雀風是時海魚變為黃雀故也又九月風曰鯉魚風李賀詩云鯉魚風起芙蓉老

### 花信風

歲時廣記江南自初春至初夏有二十四番風始於梅花終於楝花謂之花信風故前輩詩云二十四番花信風是也

船趕

東坡集吳中梅雨既過颯然清風彌旬歲歲如此潮人  
謂之船趕風是時海舫初回此風自海上與船俱至也  
東坡詩三旬已過黃梅雨萬里初來船趕風幾度縈迴  
渡山曲一時清駛滿江東驚回簌簌先秋葉喚醒昏昏  
嗜睡翁欲作蘭臺快哉賦却嫌分別問雌雄

石尤

宋武帝丁都護歌云都護北征時儂亦惡聞許願作石

尤風四面斷行旅唐戴叔倫贈裴明州詩知君未得去  
慚愧石尤風宋洪齋隨筆云石尤風其義未詳大段即  
打頭逆風也唐人多用之

少女

魏志管輅字公明過清河倪太守時天旱倪問何時當  
雨輅曰今夕當大雨樹上已有少女微風樹間又有陰  
鳥和鳴又少男風起衆鳥亂翔其應至矣倪不之信輅  
曰十六日壬子畢星中已有水氣乃作檄召五星宣布

星符刺下東井告南箕使召雷公電姥風伯雨師須臾  
風雲並興玄雲四合大雨河傾

大王

宋玉風賦楚襄王遊於蘭臺之宮宋玉景差侍有風颯  
然而至王乃披襟而當之曰快哉此風寡人所與庶人  
共者耶宋玉對曰此獨大王之風耳庶人安得而共之

八節

易緯通卦驗八節之風謂之八風冬至廣莫風至誅有

罪斷大刑立春條風至赦小罪出稽留春分明庶風至  
正封疆修田疇立夏清明風至出幣帛禮諸侯夏至景  
風至辯大將封有功立秋涼風至報土功禮四鄉秋分  
間闔風至解懸垂琴瑟不張立冬不周風至修宮室完  
邊城八風以時至則陰陽變道化成萬物育生王者當  
順八風行八政又服虔曰乾音石其風不周坎音草其  
風廣莫艮音匏其風條震音竹其風明庶巽音木其風  
清明離音絲其風景坤音土其風涼兌音金其風闔闔

謂之八卦風

四時

爾雅四時和為通正謂之景風南風謂之凱風東風謂之谷風北風謂之涼風西風謂之泰風焚輪謂之飂扶搖謂之焱風與火為庀迴風曰飄日出而風曰暴陰而風曰曠風而雨土曰霾註云頽暴風從上下也焱暴風從下上也庀焔焔熾盛也飄旋風也又拾遺記崑崙山有四面風東南西北一時俱作

雌雄風

宋玉風賦清清冷冷愈病折醒發明耳目寧體便人此所謂大王之雄風也中唇為脣得目為眇啗齧嗽獲死生不卒此所謂庶人之雌風也

離合風

陸機要覽列子御風嘗以立春遊八荒立秋歸乎風穴是風至草木發生去則搖落謂之離合風

開甲散萌



董仲舒曰太平之世風不鳴條開甲散萌而已矣雨不破塊潤葉浸莖而已矣霧不塞望浸淫被泊而已矣雪不封樹凌殄毒害而已矣

順物布氣

楊泉物理論風者陰陽亂氣激發而起者也怒則飛沙揚礫發屋拔樹喜則搖枝動草順物布氣天地之性自然之性也

起蘋

宋玉風賦夫風生於地起於青蘋之末浸淫谿谷盛怒  
於土囊之末緣於泰山之阿舞於松柏之下又唐李嶠  
風詩曰落日生蘋末搖颺徧遠林帶花疑鳳舞向竹似  
龍吟月動臨秋扇松清入夜琴蘭臺宮殿峻還拂楚王  
襟

制薤

荊山圖佷山縣山下有石床傍生野薤人往乞者神許  
風順制其分人隨偃而剪不得過越

秋風辭

漢武帝幸河東祠后土與羣臣燕飲作秋風辭曰秋風  
起兮白雲飛草木黃落兮雁南歸汎樓船兮濟汾河橫  
中流兮揚素波

秋風曲

羯鼓錄唐明皇製秋風高一曲每奏之則秋風徐來夜  
葉交墜

綴鈴

開元遺事五王宮中各立長竿挂五色旌於竿上四陲綴以金鈴如鈴有聲即往視旌之所向可以知四方風候懸玉

開元遺事唐岐王宮中於竹林內懸碎玉片每夜聞相觸之聲即知有風號占風鐸

相風竿

晉車駕出以相風竿在前刻鳥於竿上名相風竿今檣鳥是其遺意

候風綰

淮南子曰若綰之候風也許慎曰綰候風扇也楚人謂之五兩文選曰占五兩之動靜註云以鷄羽為之重五兩繫於檣尾以候風故唐李愷送楊少府貶柳州詩惡說南風五兩輕胡宿津亭詩五兩風來不暫留

楚王亂軍

史記項王圖漢王三匝於是大風從西北起折木發屋揚沙石楚軍大亂漢王乃得與數十騎遁去

明帝拜令

宋書明帝體肥憎風夏月常着小皮衣拜左右二人為  
司風令每風起方面輒先啟聞

旦南暮北

東漢鄭弘傳射的山南有白鶴嘗為仙人取箭弘嘗採  
薪此山得一遺箭頃有人來覓箭弘還之其人問弘何  
所欲弘知其神人也乃曰嘗患若耶溪採薪為難願旦  
南風暮北風故若耶溪風至今猶然人呼為鄭公風紹

興府城東南二十五里有樵風涇即此唐宋之間詩歸  
舟何慮遠日暮有樵風

夏出冬入

荊州記宜都佷山縣有山山有穴口大數尺名曰風井  
土囊夏則風出冬則風入出入之間吹拂左右常淨暑  
月經之凜然有衣裘想

銅烏

郭緣生述征記長安宮南靈臺上有銅渾天儀又有相

風銅鳥或云此鳥遇千里風乃動

石燕

湘州記零陵山有石燕遇風雨則飛風雨止還化為石也按此物大如指面形似燕今象州溪石中有之鑿石取出磨去腹下半邊置醋碟中能兩兩相就拆開復合亦怪物哉

爰居避災

國語海鳥曰爰居止於魯東門外臧文仲使國人祭之



展禽曰今茲海其有災乎夫廣川鳥獸恒知避其災  
也是歲海多大風

烏鵲識歲

淮南子曰烏鵲識歲歲多風則去喬木而巢扶枝許慎  
注云扶傍也

齊殿

史記庶女者齊之寡婦養姑孝姑女利母財而殺母以  
誣寡婦婦不能自解以冤告天而大風襲於齊殿

陶憲

晉陶潛字淵明一字元亮號靖節五六月中高卧北窓之下清風颯至自謂羲皇上人

尹喜占

神仙傳老子將去周西出關以升崑崙關令尹喜占風逆知有神仙過乃掃道見老子老子知喜命應得道乃停關下以長生之事授之

列子御

莊子曰列子御風而行泠然善也旬有五日而後返按  
列子鄭人名禦寇御迎也

封姨

博異志唐天寶中處士崔玄微有宅在洛苑東時春夜  
風月清朗忽有青衣人引入綠裳者前曰某姓楊指一  
人曰李氏又一人曰陶氏又指一緋衣小女曰姓石名  
醕醕玄微相見畢乃命坐月下問出行之由對曰欲到  
封十八姨處坐未定門外報封家姨來也衆皆驚喜出

迎玄微又出見封氏言詞泠泠有林下風氣遂揖入坐  
處士命酒各女伴歌以送之至十八姨持盞性輕佻翻  
酒污醕醕衣裳醕醕怒拂衣而起諸人皆起至門外別  
十八姨而去諸女西入苑中而別明夜又來醕醕曰諸  
女伴皆住苑中每歲多被惡風所撓常求十八姨相庇  
昨醕醕不能低回應難取力處士儻不阻見庇每歲旦  
作一朱幡上圖日月五星之文於東苑立之則免難矣  
今歲旦已過請至二月二十一日立之處士依言立幡

是日東風刮地自洛南折樹飛沙而苑中繁花不動玄  
微乃悟諸女曰姓楊李陶及衣服顏色之異皆衆花之  
精也緋衣名醋醋即石榴也封十八姨乃風神也後數  
夜楊氏輩復來愧謝各裹桃李花數斗勸崔生服之可  
延年却老

颶母

南越志熙安間多颶風颶者具四方之風也常以六七  
月發未至時三日鷄犬為之不寧一曰懼風言怖懼也

又嶺表錄曰夏秋之間有暈如虹者謂之颶母必有颶風蘇叔黨有颶風賦

神女廢行

博物志太公為灌壇令武王夢婦人當道夜哭問之曰  
吾東海神女嫁西海神童今為灌壇令當道廢我行我  
行必有大風疾雨是毀君之德也武王覺召太公問之  
果有暴風疾雨從太公邑外而過

使君不獵

幽怪錄蕭至忠為晉州刺史欲出獵有樵者於霍山見  
一長人俄有虎兕鹿豚狐兔駢雜而至長人曰余九冥  
使者奉帝命蕭使君畋汝輩若干合鷹死若干合箭死  
有老麋屈膝求救使者曰試為求計羣獸從行樵者覘  
之至深巖有茅堂黃冠一人老麋哀請黃冠曰若令滕  
六降雪巽二起風即蕭使君不出矣羣獸散去翌日未  
明風雪大作竟日蕭果不出按滕六雪神巽二風神

解凍

禮月令立春之日東風解凍

祛塵

王子年拾遺記崑山有四面風又有祛塵風若衣服塵  
汚風至吹衣則淨

雨 附禱雨

釋名雨水從雲下也雨者輔也言輔時生養也廣雅  
雨師屏翳風俗通雨師玄冥列仙傳赤松子神農時  
雨師爾雅暴雨謂之凍雨小雨謂之霖霖三日已往



為霖久雨曰淫雨與雪雜下曰霰梁元帝纂要疾雨  
曰驟雨徐雨曰零雨久雨曰苦雨亦曰愁霖雨晴曰  
霽雨而晝晴曰啓雨水曰潦時雨曰澍京房易候太  
平之時凡歲三十六雨此休徵時若之應

洗兵

說苑武王伐紂過隧則斬岸遇水則折舟示人無反志  
也至有戎之隧大風折旆散宜生諫曰此非妖歟武王  
曰非也天落兵也風霽而乘之以雨散宜生又諫曰此

非妖歟武王曰非也天洗兵也又抱朴子出軍雨沾衣是潤兵也其軍有喜

### 滅火

葛洪神仙傳後漢樂巴字叔元蜀人徵入為尚書正朝大會巴得酒不飲面西南嘆之有司奏巴大不敬詔問巴巴謝曰臣本縣成都市失火故嘆酒為雨救之帝以驛書馳問咸云雨從東南來有酒氣火遂熄又晉書樊英字季齊隱於壺山嘗有黑風從西南起英謂學者曰

成都市火甚盛因含水西向噉之乃記其時日後有從  
蜀郡來者云是日大火有雲從東起須臾大雨火遂滅

月離於畢

見月

巽化為坎

周易集林雜占占天雨否外卦得陰為雨得陽不雨其  
爻發變得坎為雨得離不雨巽化為坎先風後雨坎化  
為巽先雨後風

商羊舞

家語齊有一足鳥飛集殿前舒翅而跳齊侯遣使問孔子孔子曰此鳥名商羊水祥也昔童兒有屈其一足者振迅兩臂而跳且謠云天將大雨商羊起舞今齊有之將有大水災也急治溝渠修隄防果大霖雨諸國俱傷惟齊有備乃免

焦明至

樂動聲儀焦明至為雨備焦明水鳥也

漬穴

吳錄湘東郡新平縣有龍穴天旱人共過水漬穴輒雨

穢淵

羅浮山記山有龜淵淵有神龜龜鼻貫銅環若有人穢此淵龜便浮出即澍雨

旆浴天河

黃子發相雨書四方北斗無雲惟天河中有雲三枚相連如浴旆三日必大雨述異志夜半天漢中有黑氣相

連俗謂之黑豬渡河雨候也

蟻封穴戶

東觀漢記沛獻王輔善京氏易永平五年京師少雨上御雲臺自為卦以周易林占之其繇曰蟻封穴戶大雨將至上以問輔輔曰蹇艮上坎下艮為山坎為水山出雲為雨蟻穴居知雨將至故以封穴

鶴鳴埵

詩豳風我來自東零雨其濛鶴鳴於埵婦嘆於室鶴水

鳥將陰雨則鳴埤雅鵲鳩陰則屏逐其婦晴則呼之語  
曰天將雨鳩逐婦

鼃浮波

淮南子曰朱鼃浮於波上必有大雨

魚噉

淮南子曰天將雨也陰曠未集而魚已噉矣

蜃躍

淮南子曰黑蜃神蛇潛泉而居將雨則躍

星照濕土

姚令威叢話諺云乾星照濕土來日依舊雨王建詩今年思家客裏愁雨聲落落屋簷頭照泥星出依然黑淹爛庭花不肯休

水開圓紋

唐李嶠斜雨詩斜影風前合圓紋水上開

巫山神女

宋玉高唐賦序楚襄王與玉遊雲夢之臺望高堂之觀



上有雲氣王問玉此何氣玉對曰所謂朝雲也昔者先王嘗遊高唐怠而晝寢夢一婦人曰妾巫山之女也為高唐之客聞君遊高唐願薦枕席王因幸之去而辭曰妾在巫山之陽高丘之阻朝為行雲暮為行雨朝朝暮暮陽臺之下旦朝視之如言故為立廟號曰朝雲按序中先王乃指懷王非指襄王也至宋玉神女賦序乃云襄王遊雲夢之浦使玉賦高唐之事其夜王寢果夢與神女遇則世傳襄王雲雨之事蓋本於此宋洪景廬特

辯其誣

華陽洞仙

真誥張元賓得仙入華陽洞為理禁伯其職主水蓋雨官也

樂水

荆楚歲時記十月天時和暖似春故曰小春此月內一雨謂之液雨百蟲飲此而藏蟄俗呼為樂水

醴泉

爾雅甘雨降萬民以喜謂之醴泉

玉女披衣

王采安城記萍鄉西城津有玉女岡天當雨輒先湧五色雲氣於石間俗謂之玉女披衣段成式詩不願石郎戴笠難甘玉女披衣言雨多也

雷君出裝

易林變占雷君出裝隱隱西行霖雨不止流為江河

山上鳴鼓

武昌記城西有石鼓山上有三石鼓鼓鳴天必雨

殿前雨珠

梁大同中嘗驟雨殿前往往有雜色寶珠武帝觀之有  
喜象虞竒因上瑞雨頌飛甘灑潤玉散珠聯

打葉

詩話王禹錫賀知縣春雨詩打葉雨拳隨手重吹涼風  
口逐人來

濯枝

周處風土記六月有大雨名濯枝雨夏至前雨為黃梅  
雨沾衣服皆敗黥埤雅云今江湘二浙四五月間梅欲  
黃落則水潤土溽柱礎皆汗鬱蒸成雨謂之梅雨故自  
江以南三月雨謂之迎梅五月雨謂之送梅

三時雨

荆楚歲時記六月必有三時雨田家以為甘澤邑里相  
賀

六月雨

魯僖公三年六月雨雨云者喜雨也

旦日雨

金樓子以旦日雨為月額雨

旬日雨

鹽鐵論周公之時風不鳴條雨不破塊旬日雨雨必至  
夜

榆莢

太平御覽春雨為榆莢雨

豆花

歲時記里俗以八月雨為豆花雨

使者馳馬

神異記西海上有人乘白馬朱鬣白衣玄冠從十二童子馳馬如飛名曰河伯使者所至之國雨水滂沱

婦人牧羊

異聞錄柳毅見涇川婦人牧羊問何物曰非羊也雨工也雷霆之類也

甲子雨占

朝野僉載唐俚語云春雨甲子赤地千里夏雨甲子乘船入市秋雨甲子禾頭生耳冬雨甲子牛羊凍死鵲巢下地其年大雨

戊申雨候

黃子發相雨書常以戊申日候日上有冠雲不問大小黑者大雨青者小雨師曠占曰五卯日候西北有雲如羣羊者雨至矣



氣薄

漢董仲舒傳陰陽之氣上薄為雨下薄為霧風其噫也雲其氣也雷其相搏之聲也電其相擊之光也雨乘虛而墜風多則合速故雨大而踈風少則合遲故雨細而密太平之世風不鳴條雨不破塊雷不驚人電不眩目雪不封條此聖人在上陰陽和也鮑敞問曰雨既為陰陽相薄四月純陽十月純陰無二氣相薄則不雨乎仲舒曰純陽用事未夏至一日是純陰用事未冬至一日

是敞曰其不雨乎曰然有則妖也此出西京雜記

雲蒸

淮南子山雲蒸柱礎潤皆將雨之候也

蜀西天漏

雅州在蜀之西其地陰盛常雨如天之漏名曰漏天古詩地近漏天終日雨杜詩鼓角漏天東

浙西天泣

唐五行志中和三年浙西天鳴聲如轉磨無雲而雨占

曰無雲而雨是謂天泣

粟化為蟲

述異記荊州久雨粟化為蟲

麥化為蛾

述異記晉永嘉中梁州雨十旬麥化為蛾飛

散絲

古詩騰雲似灑煙密雨如散絲錢昭度詩酒樓人散雨

千絲

垂布

僧可遵驟雨詩掣電引狂雷晝天忽成暮萬里瀉銀河  
四簷垂瀑布

仲尼假蓋

家語孔子將遠行命從者皆持蓋已而果雨巫馬期問  
曰旦無雲既日出而夫子命持雨具敢問何以知之子  
曰昨暮月宿畢詩不云乎月離於畢俾滂沱矣以此知  
之

林宗墊巾

後漢書郭林宗於陳梁間行遇雨巾墊一角時人乃故折巾角以為林宗巾其見慕如此

發政來雨

管子曰春發五政一論孤幼赦有罪二賦爵列授祿位三修溝洫復亡人四治封疆正阡陌五無殺麇卵無絕華萼五政得時春雨乃來

奉符行雨

幽怪錄唐李靖字藥師徵時嘗射獵山中會暮抵宿一  
朱門家夜半聞扣門甚急見一婦人謂靖曰此非人世  
乃龍宮也今天符命行雨二子皆不在欲奉煩頃刻間  
何如遂命黃頭被青驄馬又命取雨器乃一小餅也戒  
曰馬躩地嘶鳴即取餅中水一滴滴馬鬃上此一滴水  
乃地上三尺慎勿多也既而電掣雲間見所憩村靖特  
連下一十餘滴此村夜半平地水三丈

劉城奏鼓

述異記廬山有康王谷北嶺上有一城號為劉城天每  
欲雨輒聞有奏簫鼓笳角之聲村人以為候

棧道淋鈴

明皇雜錄上初入斜谷屬霖雨彌旬於棧道中聞鈴聲  
與山相應上悼念貴妃因采其聲為雨淋鈴曲以寄恨  
峴山張蓋

三山小牘安定郡有峴陽峰峰上有池若將雨則雲起  
池中若車蓋然里諺曰峴山張蓋雨滂沱

紋石出津

唐蘇頲有一錦紋花石鏤為筆架置硯席間每天欲雨即津出如汗逡巡而雨頲以此為候

盧汾題堂

搜神記盧汾夢入蟻穴見堂宇題其名曰審雨堂

蘇軾名亭

東坡喜雨亭記一月三雨伊誰之力民曰太守太守不有歸之天子天子曰不然歸之造物造物不自以為功



歸之太空太空冥冥不可得而名吾以名吾亭

成湯剪髮

已下禱雨

成湯伐桀之後大旱七年煎砂礫石太史占之當以人  
禱湯曰吾所為請雨者為民也若以人禱吾請自當遂  
齋戒剪髮斷爪素車白馬身嬰白茅以為犧牲禱於桑  
林之野持三尺鼎祝於山川曰政不節歟民失職歟宮  
殿崇歟女謁盛歟苞苴行歟讒夫昌歟言未已大雨方  
數千里

周宣側身

詩大雅周宣王承厲王之烈內有撥亂之志遇災而懼  
側身修行欲消去之天下喜於王化復行故仍叔作詩  
以美之詩曰倬彼雲漢昭回於天王曰於乎何辜今之  
人天降喪亂饑饉薦臻靡神不舉靡愛斯牲圭璧既卒  
寧莫我聽旱既太甚蘊隆蟲蟲不殄禋祀自郊徂宮上  
下奠瘞靡神不宗旱既太甚滌滌山川旱魃為虐如惓  
如焚我心憚暑憂心如熏

暴野

晏子春秋齊景公時大旱乃問羣臣曰天久不雨民有飢色寡人欲少賦歛以祠靈山可乎晏子進曰夫靈山固以石為身草為髮天久不雨髮將焦身將熱彼獨不欲雨乎祠之無益公曰吾欲祠河伯可乎晏子曰夫河伯以水為國以魚鼈為民天久不雨百川將竭民將亡矣彼獨不用雨乎祠之無益景公曰奈何曰君避宮殿暴露山野與靈山河伯共其憂其幸而雨乎公如其言

三日果大雨

燒山

酉陽雜俎太原郡東有崖山天旱土人常燒此山以求雨俗傳崖山神娶河伯女故河伯見大火必下雨救之

舉石

雜俎荊州永豐縣有卧石長九尺六寸其形似人體青黑狀若雕刻若歲旱便齊手而舉之小舉小雨大舉大雨

徙市

禮檀弓魯歲旱穆公召縣子而問曰天久不雨吾欲暴  
庭而奚若曰天則不雨而暴人之疾子虐毋乃不可歟  
然則吾欲暴巫而奚若曰天則不雨而望之愚婦人以  
求之毋乃已疏乎徙市則奚若曰天子崩巷市七日諸  
侯薨巷市三日為之徙市不亦可乎注云徙移也今早  
而欲徙市者行喪君之禮以自責也故傅亮喜雨賦遵  
縣子之徙廛尤魯侯之焚巫

閉南門

史記董仲舒為江都王相以春秋災異之變推陰陽所以錯行故求雨閉諸陽縱諸陰其止雨反是按閉陽縱陰謂如閉南門毋舉火開北門水灑人之類也

禱西宮

宋仁宗慶厯間京師久旱群臣請帝親禱於郊帝曰太史史言月二日當雨今將以旦日出禱王素曰臣非太史然度是日必不雨帝問其故素對曰陛下知旦日雨而

禱之不誠不誠不可動天帝竦然詔明日特詣西太乙  
宮禱雨命素扈從此日日甚熾埃氛翳空車駕還未薄  
城天大雷電而雨

佷山鞭石

盛弘之荆山記佷山縣有一山獨立峻絕西北有石穴  
以燭行百步許有二大石一為陰石嘗潤一為陽石嘗  
燥水旱為災鞭陰石則雨鞭陽石則晴

昆池結壇

雜俎孫思邈隱終南山與宣律和尚相接時大旱西域僧請於昆明池結壇祈雨詔有司備香燈凡七日縮池水數尺忽有老人夜詣宣律和尚求救曰弟子昆明池龍也無雨已久非由弟子今胡僧利弟子腦將為藥欺天子言祈雨命在旦夕乞和尚法力相救宣律辭曰貧道持律而已可求孫先生老人因至思邈石室求救孫謂曰我知昆明龍宮有仙方三千首爾與予予將救汝老人曰此方上帝所禁不許妄傳今急矣固無所恡有



項捧方而至孫曰爾第還母慮胡僧也自是池水忽漲數日溢岸胡僧羞恚而死

祭孝婦

東海有孝婦少寡無子養姑甚謹夫死不嫁姑告鄰人曰孝婦養我勤苦哀其無子守寡我老久累無丁壯奈何遂自經而死姑女告婦殺我母吏捕孝婦婦誣服具獄上府于公以為養姑十年以孝聞此婦不殺姑也太守不聽數爭不能得於是公辭疾去太守竟殺孝婦郡

中枯旱三年後太守至殺牛自祭孝婦塚因表其墓天  
立大雨歲熟

罷宰臣

塵史朝請郎杜球言永熙幸佛寺禱雨至天慶三館起  
居因駐輦問曰天久不雨柰何或對天數或對禱至誠  
必有應一綠衣少年越次對曰刑政不修故也上頷之  
而歸復駐輦召綠衣者問狀對曰某所守臣犯贓法當  
配宰相以親不配某所守臣犯贓不當死宰相以嫌卒

死之翌日上為罷宰相天即大雨綠衣者冠萊公也

興師致雨

左僖十九年衛旱卜有事於山川不吉寧莊子曰昔周饑克殷而年豐今邢無道天其欲衛討邢乎從之師興而雨

請客值雨

東都周宗慤平日未嘗作東一日請客久旱忽雨朱溫戲之曰驕陽為虐已成災賴有筵開周秀才莫道上天

無感應故交風雨一齊來

積薪自焚

謝承後漢書戴封字平仲遷西華令時大旱祈請不獲  
乃積薪坐其上以自焚火起而天雨遠近嘆服遷中山  
相

環艾自焚

范曄後漢書諒輔仕郡為五官掾時夏大旱太守自祈  
請輔曰若日中不雨請以身塞無狀於是積薪聚艾以

自環構火將自焚及中時而天雲晦合須臾澍雨

周暢葬骸

東漢周暢字伯持為河南尹夏旱久禱無雨因收葬洛城旁客死骸骨萬餘應時澍雨

袁安延命

周斐汝南先賢傳袁安字邵公為楚王相會楚王英事互相牽引拘繫者千餘人三年而獄不決坐掠幽而死者百餘人歲大旱安決獄事人人具錄其辭狀本非首

謀為王所引者應時理遣一句之中延千人之命其時  
甘雨滂沱歲亦大熟

刺史行部

漢書百里嵩字景山為徐州刺史境遭旱嵩行部所至  
甘雨輒降東海祝其合鄉等縣父老訴曰人等是公百  
姓獨不先降乃迴車赴之雨隨車而下

太守行春

後漢鄭弘字穉卿為南陽太守郡中大旱弘行春所到

隨車致雨

謝魯班

雜俎魯班燉煌人巧侔造化嘗怨吳人殺其父於肅州城南乃作一木仙舉手指吳地大旱三年吳人卜曰此班所為也乃賫物謝之班斷木仙一手吳中大雨

烹弘羊

漢武帝時歲小旱上令百官求雨卜式言曰縣官當食租衣稅而已今桑弘羊令吏坐市列肆販物求利烹弘

羊天乃雨

請雨通神

晉束皙字廣微武帝時人疏廣之後也太康中大旱百姓聞皙名請皙禱雨皙沐浴禱告三日大雨民歌之曰東先生通神明請天三日甘雨零我黍以育我稷以榮何以酬之願束長生自此朝野知名擢為著作郎

得雨移神

唐司空圖字表聖河中人咸通末進士嘗作移雨神文



曰夏月不雨民前後走神所剝羊豕而跪乞者凡三而後得請民大喜且將報祀愚獨以為惑何則天以神乳育百穀必時既豐然後民相率以勞神之勤於事而祀焉今始恡其施以愁疲民是神怠天之職也必希民之求而遂應是神玩天之權也既應而俾民推怨於上歸惠於已是神攘天之德也推怨何以為義利腥羶之饋何以為仁怠天下之事何以為敬蔑是數者何以為神假曰非吾所得顓然知民之情而不時請於上是亦徒

偶於位此愚所以惑也噫天不可終慢民不可久侮竊  
為神危之柰何

太后舉寬

東觀漢記永初二年三月京師旱至五月和熹鄧太后  
幸雒陽省獄舉寬未還宮而澍雨大降

御史辯獄

唐顏真卿字清臣為監察御史使河隴時五原有寬獄  
久不決天且旱真卿辯獄而雨郡人呼為御史雨

頓首祈雨

宋景公時大旱三年卜之以人祠乃雨公下堂頓首曰  
吾所以祈雨將自當之言未卒天大雨

減壽乞霖

宋高南為奉新令禱旱未雨有願減十年壽乞為三日  
霖之句朱熹時守南康聞而嘉之曰使吾屬皆如高令  
尹吾何憂乎

投魃

神異經南方有人長二三尺袒身而目在頂上走行如風名曰魃所見之國赤地千里一名貉遇者得之投溷中乃死旱災即消

### 簸神

雜俎唐明皇命梵僧不空祈雨不空每祈雨但設數繡座手簸旋數寸木神念呪擲之自立於座上伺木神吻角牙出目演則雨至

### 泛蜥蜴

倦游錄宋熙寧中京師久旱按古法令坊巷以甕貯水  
插柳枝泛蜥蜴小兒呼曰蜥蜴蜥蜴興雲吐霧降雨滂  
沱放汝歸去時蜥蜴不能盡得以蝎虎代之入水即死  
小兒更曰冤苦冤苦我是蝎虎似恁昏沉怎得甘雨

浮蛇醫

雜俎王彥威鎮汴夏旱李玘過汴因留宴王以旱為言  
李醉曰欲雨甚易爾可求蛇醫四頭石甕二枚每甕實  
以水浮二蛇醫以木蓋密泥之置於鬧處甕前後設席

燒香選小兒十歲以下者十餘令執小青竹晝夜更擊其甕不得少輟王如言試之一日兩夜雨大注

作土龍

淮南子曰土龍致雨注云湯遭旱作土龍以象雲從龍舞方龍

神農求雨書甲乙日不雨命為青龍東方小兒舞之丙丁不雨命為赤龍南方壯者舞之戊己不雨命為黃龍中央壯者舞之庚辛不雨命為白龍西方老人舞之壬

癸不雨命為黑龍北方老人舞之如此不雨潛處闔南門置水其外開北門取人骨埋之如此不雨命巫祝而曝之曝之不雨積薪擊鼓而焚神山

方士吹龍

抱朴子曰使者甘宗奏西域事云有方士能神呪者臨泉禹步吹氣龍便浮出長十數丈更吹輒縮至數寸乃掇取著壺中或有四五龍以水養之聞有旱處便噴龍往出壺中一龍著潭中復禹步吹之長十數丈須臾而

雲雨四集

處士驅龍

唐牛僧孺字思黯鎮襄陽久旱有處士能豢龍公請致  
雨處士曰江漢間無龍獨湫泊中有黑龍難制強驅之  
必為災公固命之果大雨漂流萬戶又宋真宗咸平間  
知揚州魏羽上雩祀五龍祈雨法詔頒諸路其法以甲  
乙日擇東方地作壇取土造青龍丙丁日擇南方地作  
壇取土造赤龍餘三方可類推凡旱建壇取五行生成



之數長吏齋三日詣龍所汲流水設香茗果率郡官日  
再至祝酬不用樂并巫覡雨足送龍於水

泥石牛

顧徵廣州記鬱林郡山東南有池池有石牛歲旱百姓  
殺牛祈雨以牛血和泥泥石牛背祠畢大雨洗牛背泥  
盡即晴

張畫龍

宋朝事實擇潭洞或湫澿林木深邃之所以庚辛壬癸

日先齋戒以酒脯告社令築方壇三級高一尺濶一丈  
三尺壇外二十步介白繩壇上植竹枝張畫龍其圖以  
縑素畫黑魚左顧環以天黿十星中為白龍吐雲黑色  
其下畫水波有龜亦左顧吐黑氣如線和金銀朱丹飾  
龍形又設皂幡刎鵞頸取血置盤中楊枝灑水龍上郡  
官日再至祝雨足取龍投水中蘇東坡詩長笑蛇醫一  
寸腹銜水吐電何時足蒼鵞無罪亦可憐斬頭橫盤不  
敢哭豈知泉下有豬龍卧枕雷車踏陰軸前年太守為

早請雨點隨人如散菽

祠女郎魂

昌黎詩乞雨女郎魂  
魚羞潔且繁廟開鼯鼠叫  
神降越巫言早氣期銷蕩  
陰官想駿奔行看五馬入  
蕭颯已隨軒

減太官膳

東坡詩湯帝嗟諮徵六事  
漢廷灾異劾三公聖朝罪已  
恩寬大時雨愆期旱蘊隆  
東海得無冤死婦南陽疑有

卧雲龍傳聞已減太官膳肉食諸公盍奏功


器上龍狀

雜俎唐開元中天旱玄宗令僧一行祈雨一行言當得一器上有龍狀方可致雨上令於內庫中徧觀之皆言不類數日後指一古鏡鼻盤龍喜曰此有真龍矣乃持入道場一夕而雨

潭中虎頭

東坡集徐州城東有石潭與泗水通天旱置虎頭於潭

中可致雲雨



山堂肆考卷四